

## مراد دل

یار قرآن مجیدم آقاما عبد عبیدم  
 من ابوالفضله مریدم  
 ضد فرهنگ یزیدم بودی واللّٰهی عقیدم  
 من ابوالفضله مریدم



بی بضاعت قلم اوصافین اونون شرح الینمز  
 دُری غربال ائلینمز  
 اهل عشق ایستوره ابوالفضلین آدین ئوزگه دینمز  
 الفین هُجه لینمز  
 آشنا کوینگینی زاهد بیگانه گینمز  
 ئوزون عارف بزینمز  
 گی بو استبرقی عرض ایله منه وئردی علی دم  
 من ابوالفضله مریدم

هر کیمین مشگلی اولسا شرف الناسی چاغورسون  
 فقط عباسی چاغورسون  
 خطر احساس ائلینده گل احساسی چاغورسون  
 فقط عباسی چاغورسون  
 شیعه ظلماتیده نه خضری نه الیاسی چاغورسون  
 فقط عباسی چاغورسون  
 گئجه دن قورخی یوخوم هم نفس صبح سفیدم  
 من ابوالفضله مریدم  
 باخدیم عباسین آلا گوزلرینه حیدری گوردوم  
 جلوه ی داوری گوردوم  
 هامینی بیر علم آلتندا اونا مشتری گوردوم  
 حمزه و جعفری گوردوم  
 خیمه ی عشقه ستون دست هنر پروری گوردوم  
 او اوزون اللری گوردوم  
 قل هو الله قسم واله اول یار وحیدم  
 من ابوالفضله مریدم

اولیادن بیرسی ایلدی مهدیله ملاقات  
 گوروب انوار کمالات  
 متحیر دیور اگلشمشیدیم غرق مباحات  
 آقا مشغول مناجات  
 نئچه مأمور گلوب نامه لر الده همان اوقات  
 گورسنوب نور کرامات  
 ائشیت ای دل که دیورسن پی پیغام نویدم  
 من ابوالفضله مریدم  
 باخدی اول نامه لره گوردوم او مولای خجسته  
 والهم دیده ی مسته  
 بعضی سین هی ئوپوب ئوپدوقجا قویوب گوزلری اوسته  
 دله گلدیم من خسته  
 خبر آلدیم جریانی دئدیم ای جان سنه بسته  
 قلبمی ائتمه شکسته  
 ندی بو نامه لر ئوپدوقجا دئدون غرق امیدم  
 من ابوالفضله مریدم

دندی حضرت، منه چوخ نامه گلر هر مه و هر سال  
 که منم قبله‌ی آمال  
 لیک بو نامه‌لری ایلوب امامزاده‌لر ارسال  
 تا یازام نسخه‌ی احوال  
 ئو پدوگوم نامه‌لر عباس عموموندی یازوب اجمال  
 تاپشوروب ائلیم اقبال  
 نه دئسه یوخ دئمرم عاشق سقای شهیدم  
 من ابوالفضله مریدم  
 ائشیدوبسوز که سفارش ائلیوب مهدی زهرا  
 که اودی عالمه مولا  
 بیوروب هاردا عموم آدینه مجلس اولا برپا  
 یغیلا اهل تولّا  
 ائدرم شرکت او مجلسده دیون بلسین احبّا  
 اوجادی پرچم سقا  
 بو پیامی ائشیدوب طالب الطاف مزیدم  
 من ابوالفضله مریدم

کیم ابوالفضل آدینی دوتسا احبّا دیر احسن  
 اهل معنا دیر احسن  
 سسلم بو آدی صدیقه‌ی کبرا دیر احسن  
 بلی زهرا دیر احسن  
 من ئوزوم قطره‌یم اما منه دریا دیر احسن  
 علی مولا دیر احسن  
 نه کلینی و نه انصاری و نه شیخ مفیدم  
 من ابوالفضله مریدم  
 احترام ایلر علی اوغلو ارباب ادبیلر  
 یعنی اخلاص طلبیلر  
 یوخدی هئچ کسده به جز حیدر او اندازه لقبیلر  
 وار بو القابه سبیلر  
 ایندیده قانلی گوزون یاد ائلیوب قورخار عربیلر  
 ایلیوب بسکه غضبیلر  
 گورسدوب معجزه‌لر مایل اعجاز جدیدم  
 من ابوالفضله مریدم

دندیم العاقلُ یکفیه الاشاره بطن اولسا  
 بیزیم عشقه گولن اولسا  
 دئنن عشاقه دولاشما اگر عقلون کسن اولسا  
 قائل بوالحسن اولسا  
 باخماز عباس، ورار مدعی هر بد دهن اولسا  
 گیرم اهل یمن اولسا  
 شیعه سن قورخما دئنن دشمن اشرار پلیدم  
 من ابوالفضله مریدم  
 ساتمارام ساتمامیشام عشقیمی بازار ریاده  
 لعن اولا ابن زیاده  
 آمارام آلامیشام رشوه وئرم دینمی یاده  
 وار گوزوم کرب وبلاده  
 قره کوینک منه بسدی نه ایشیم بیع و شراده  
 قوی دئسونلر منه ساده  
 نه فروشندهی عشقم نه دهه دلآل خریدم  
 من ابوالفضله مریدم



بارک الله و ثروب الله آقاما دولت دایم  
 ایلیوب دلره حاکم  
 دستخطی نه گوزلدی که ئوپور مهدی قائم  
 همی قایم همی صایم  
 علمندن ئوپرم گویده ده یوخ بیله علایم  
 اولوب عالم اونا خادم  
 آستان بوس ملوکانه ی سردار رشیدم  
 من ابوالفضله مریدم  
 معرفتدن ادب، عباسین آدین ساخلادی زنده  
 عشقیده اولدی برنده  
 گوز آچان گوندن اوتوزدورد ایل اولوب شاهینه بنده  
 احسن اول قد بلندده  
 ساتمادی دیننی دنیا یه امان نامه گلنده  
 وردی زهرا اونا خنده  
 امر ائدوب شمره قییت حقدی منیم پیشه و ایدم  
 من ابوالفضله مریدم

دئمه ردّ ائتماخ امان نامه‌نی آساندی - چتیندی  
 هامینون جانی شیریندی  
 ولی عباس علی اوغلی علمدار امیندی  
 پسر امّ‌بنیندی  
 دئدی اول قاصده انساندا ملاک ارزش دیندی  
 علی اولادی متیندی  
 احسن عباسه که مفتون او تصمیم اکیدم  
 من ابوالفضله مریدم  
 ایندیده دوشسه یولون بارگه قدس حسینیه  
 یعنی بین‌الحرمینیه  
 ایکی گنبدده علامت وار ایکی نور دو عینه  
 هی اسوللر طرفینه  
 بیری منسوبیدی شمسه بیری تاج‌القمرینه  
 پسر شیر حُنینیه  
 جلوه‌ی عشقی گوروب فارغ هر وعده وعیدم  
 من ابوالفضله مریدم



خاطربین بسکه چوخ ایستردی حسینون او جوانمرد  
 جنگیدن ائتدی عقب گرد

سورا خاطر باشینی سالدی بلایه چوخالوب درد  
 قول دوشوب اولمادی دلسرد

باش سینوب مشکینه اوخ دگدی فنا اولدی ره آورد  
 ال چالوب دشمن نامرد

ائتمدی هئچ گله شرمندهی اخلاق حمیدم  
 من ابوالفضله مریدم

پرچمی سینه ده اشرار آراسندا دولانوردی  
 قان آخوب قلبی یانوردی

مرکب ایستوردی گنده خیمیه، راکب دایانوردی  
 بالالاردان اوتانوردی

گه باخوب پارچالانان مشگه گوز اشگه بویانوردی  
 ئورگی پارچالانوردی

خضر ظلماتیده سسلوردی بودی نور دو دیدم  
 من ابوالفضله مریدم

او مراد عرفا چاتدی غرض فیض مدامه  
 دوشدی عنقاکیمی دامه  
 سرنگون اولدی آت اوستن یوزونی دوتدی خیامه  
 دئدی ئوز دردین امامه  
 هارداسان ای باشیمون تاجی دوشوب باشدان عمامه  
 رمقیم یوخدی قیامه  
 بیر نفر یانمادی اول حاله دئدی فرد فریدم  
 من ابوالفضله مریدم  
 هانی عباسه نظیر اهل تولالر ایچینده  
 ماه سیمالر ایچینده  
 تاپا بولمز بئله سقا بیرى سقالر ایچینده  
 یانا سودالر ایچینده  
 ماهی لر ایندیده آغلار اونا دریالر ایچینده  
 شور و غوغالر ایچینده  
 وای دیر حضرت عیسیٰ گر او شیرى گوره بی دم  
 من ابوالفضله مریدم